

11.7.89

Ven. sora Maria Ursula Berther, Baldegg/Rueras

(va) Ils 7 da zercladur 1989 han las soras dalla claustra da Baldegg ed in grond diember da parentella accumpignau las restonzas terrestras da sora Maria Ursula Berther sil santeri Sonnhalde a Baldegg al davos ruaus. A quella sora ch'ha dedicau 52 onns da sia veta en survetsch al concarstgaun seigien za-contas lingias dedicadas en engrazier-vladad.

Sora Maria Ursula Berther ei naschida ils 3 da decembre 1907 sco 11. afon dils consorts Gion Fidel Berther e Maria Ursula, naschida Hendry, a Rueras/Tujetsch. Tiel batten ha ella survegniu il num Maria Ludivica. El ravugl dalla famiglia ha ella passentau ina biala giumentetgna, schegie buca senza quitaus. Cunquei che siu bab fuva daventaus ferm schiraus gia en giuvens onns en consequenza dad in accident, han ils fargliuns stuiu segidar grondamein el pign menaschi puril e sez contribuir tenor forzas per vegnir atras.

Suenter madira ponderaziun, ella vegliadetgna da 30 onns, ha Maria Ursula sentiu il clom alla veta monastica. Ed ella ei entrada calonda october 1937 ella congregaziun dallas soras da Baldegg. Gest suenter che la secunda uiara mondiala era rutta ora – numnadamein ils 6 da settember 1939 – ha ella fatg el ravugl dallas consoras a Baldegg il profess ed ei vegnida recepida en lur cuminanza sco sora Maria Ursula.

Per sora Maria Ursula entscheiva il temps da survir el rom dils pensums da quella congregaziun da mungias. Duront buca meins che 50 onns survescha ella a Diu ella cuminanza dallas soras da Baldegg. Aschia eis ella stada engeschada per enumerar mo zacontas statziuns da si'activitat ella casa d'affons a Schüpfheim, ella casa dils garsuns Wolfbach a Turitg, ella casa da vegls Klotensberg sco era els asils da Reiden e Littau. Ella ha giu quitau pil beinstar d'affons, giuvenuns, students ed ha fatg lavurs da tenercasa las pli differentas per glieud veglia. Tut quei ch'ins ha surdaу ad ella, ha ella exequiu cun carezia ed engaschi cumplein. Era cura che ella era corporalmein empau spossada, ha ella tuttina surviu tochen il davos alla cuminanza dalla claustra da Baldegg.

Duront si'entira veta eis ella sestentada – di per di danovamein – da veser el concarstgaun il Segner e Diu e survir ad el – entochen che ses mals e sias sufrientscha dalla vegliadetgna han terminau quell'aktivitat. Bein preparada per la veta eterna, eis ella morta ils 4 da zercladur 1989 ella casa da tgira dalla claustra da Baldegg ella vegliadetgna dad 82 onns.

Dieus detti alla defuncta la pagaglia beinmeritada. Nus che vein astgau evenimentar sia carezia e siu quitau vegnin a mantener ella per adina en engrazievla memoria.